

Populariti Najib: Muhyiddin tolak andaian Anwar, BN tak anggap 'serius'
The Malaysian Insider
30 Ogos, 2011
Oleh Debra Chong

PUTRAJAYA, 30 Ogos – Timbalan Perdana Menteri Tan Sri Muhyiddin Yassin menolak andaian Datuk Seri Anwar Ibrahim bahawa penurunan terus populariti Datuk Seri Najib Razak petanda sokongan kini sudah mula beralih kepada Pakatan Rakyat.

Malah, Muhyiddin (gambar) juga mengetepikan hasil kajian Merdeka Center yang diumumkan semalam sambil berkata kerajaan Barisan Nasional (BN) tidak memandang "terlalu serius" penemuan kajian itu kerana ia lazimnya bergantung pada saiz responden digunakan.

Ketika ditemui pemberita di Shah Alam awal hari ini, Anwar mendakwa kemerosotan populariti Najib menunjukkan pengundi mula beralih kepada Pakatan Rakyat.

Bagaimanapun menurut Ketua Pembangkang itu sokongan di kawasan luar bandar kekal elusif ekoran "propaganda berlebihan kerajaan" BN.

Populariti Najib menjunam ke paras 59 peratus – penurunan dari 72 peratus, paras paling tinggi, yang direkodkan pada Mei tahun lalu, dipercayai berhubung kait dengan perhimpunan Bersih 2.0 yang diadakan awal bulan lalu.

Kajian terbaru Merdeka Center menunjukkan arah aliran populariti Najib terus mengalami penurunan daripada 72 peratus pada Mei 2010 kepada 69 peratus November lalu, 67 peratus pada Mac tahun ini dan seterusnya ke paras 65 peratus Mei lalu dan yang terbaru 59 peratus.

Kadar populariti Najib pernah turun sehingga 56 peratus pada September 2009 - lima bulan selepas menjadi perdana menteri Malaysia yang keenam.

"Seramai 59 peratus rakyat Malaysia mengatakan bahawa mereka berpuas hati dengan prestasi Najib, dalam kajian (kali) ini enam peratus lebih rendah berbanding 65 peratus direkodkan pada Mei tahun ini," kata Merdeka Center.

Kajian terbaru ini dikendalikan sebulan selepas perhimpunan Bersih 2.0 di ibu negara.

Pada Mei 2009, iaitu sebulan selepas menjadi perdana menteri, populariti Najib adalah 45 peratus dan ia melonjak kepada 65 peratus pada Jun 2009 sebelum menjunam ke aparas 56 peratus pada September tahun yang sama.

"Ia tidak semestinya betul," kata

Muhyiddin, yang juga timbalan pengerusi BN ketika ditemui sempena majlis rumah terbuka Aidilfitri, di sini hari ini.

Muhyiddin berkata pesaing politik mereka itu mempunyai situasi sendiri untuk ditangani.

Bagaimanapun beliau tidak menjelaskan perkara yang dimaksudkan.

"Saya fikir Datuk Seri Anwar ada situasi sendiri. Tetapi bukan itu yang penting.

"Apa yang penting bukannya kajian, tetapi apa yang kami lakukan dari sekarang,"
Muhyiddin yang juga timbalan presiden Umno.

The Malaysian Insider

Hakcipta © 2011 The Malaysian Insider

Source: <http://www.themalaysianinsider.com/bahasa/article/populariti-najib-muhyiddin-tolak-andaian-anwar-bn-tak-anggap-serius/>